

Nachhall

Omm letzde Freidaach hawwe merr su geesche Vier unne omm Moo uffere Bonk gesotze, de Schorsch unn isch, unn hawwe iwwers Wasser geguggd. E paar Möwe sinn mett Gekrisch hie unn her gefloochte, e bissi weit ewegg iss enn Schwon geschwumme unn vunn de Brick her iss e mords Containerschiff kumme unn hott e groß Well vor sisch her gedriwwe; die Sunn, schunn e bissi im Wessde, hott kloone Welle zum Glitzern gebrochd, unn warm hottse aach gemachd.

Uff oomol frächt de Schorsch: Wonn?

Isch saach: Moins um Vier.

Donn hawwe merr widder iwwers Wasser geguggd unn isch denk, was isch jetz denk, denkt de Schorsch aach: Dess konner nimmi mache, iwwers Wasser gugge unn seh, wie die Welle glitzern, kann nimmi seh, wie enn Schwon schwimmt, e Schiff Welle mächt, wie die Möwe flieh, kann nimmi heern wie se kreische unn nimm spürn wie die Sunn oom uff die Backe scheint.

Er hädd gern noch e bissi gelebt, seet de Schorsch. Unn hädd gern noch e bissi in soim Heisje newer soiner Fraa gesotze, gesse unn gedrunke, Zeidung gelese unn Fußball odder Audorene geguggd. Unn hädd gern weider mett dir jed Woch enn Kaffee gedrunke.

Ja, saach isch, dess hädder gern.

Unn allsfort hawwe merr iwwers Wasser geguggd. Noch ooner Weil warn koo Möwe mieh doo, dess große Schiff war fort, de Schwon iss näher uff uns zugeschwumme, unn isch denk, dess iss eischendlich ess Schlimmsde, dass merr koo Verännerung mieh mettkriecht, nitt uffem Moo, nitt in Flerschem unn nitt in de Welt, unn doodebei duts jeden Aacheblig unn jeden Daach ebbes Neies gewwe, zum Kennelerne, zum Staune unn aach zum Ärjern.

Unn isch saach: Ess iss schad, dass merr sterbt.

Ja, seet de Schorsch, dess iss werklisch schad.

Eiern Honnes